

**Sp.**

**770. Tillaga til þingsályktunar**

**[344. mál]**

um endurreisn Viðeyjarstofu.

Flm.: Jón Baldvin Hannibalsson, Jóhanna Sigurðardóttir.

Alþingi ályktar að fela ríkisstjórninni að láta gera áætlun um endurreisn Viðeyjarstofu. Byggingin verði færð í upprunalegt horf, en við það miðað að þar megi stunda veitingarekstur og ráðstefnuhald. Áætlunin verði við það miðuð að verkinu verði að fullu lokið fyrir 18. ágúst 1986, en þá verða liðnar tvær aldir frá því að höfuðborg Íslands fékk kaupstaðarréttindi. Kostnaðaráætlun verksins verði lögð fram í tæka tíð fyrir afgreiðslu fjárlaga 1985.

**Greinargerð.**

„Viðey á engan sinn líkan sunnan lands. Þar er gnótt af kjarnmiklu grasi, og er hægt að fódra þar fjölda kúa, kinda og hesta. Aragrúi er þar viltra fugla eggjataka og æðardúnn. Í fjörunni er kræklingur og gnótt hrognkelsa, flyðru og annarra sjófiska uppi undir landsteinum. Eyjan liggur uppi undir landi, innanskerja að kalla má, svo að sjór er þar oftast kyrr.“

Þannig lýsir Eggert Ólafsson Viðey í Ferðabók sinni. Eyjan var kostaland og höfuðdjásn í landnámi Ingólfs. Hún hefur komið við sögu ýmissa merkisviðburða þjóðarsögunnar. Þar var, að frumkvæði Þorvalds, föður Gizurar jarls, efnt til klausturhalds árið 1226 og hélst svo framundir siðaskipti. Viðeyjarklaustur var vígt Ágústínusarreglu (svartmunka) og voru siðir þess sóttir til heilags Ágústínusar kirkjuföður (d. 430).

Samkvæmt fornum máldögum var Viðeyjarklaustur auðugast hinna níu klaustra á Íslandi í kaþólskum sið. Helstu bújarðir, þar sem nú standa Reykjavíkurborg, Seltjarnarnes og Mosfellssveit, heyrðu til klaustrinu. Þegar Danakonungur sölsaði undir sig eignir klaustranna í skjóli siðbótar reyndust þær vera 556 jarðir, þar af 116 í eigu Viðeyjarklausturs. Þar var því mikill auður í búi.

Meðal sögufrægra ábóta, sem setið hafa Viðey, má nefna Ögmund Pálsson, seinasta Skálholtsbiskupinn í kaþólskum sið. Við siðaskiptin dró til tíðinda í Viðey þegar Jón biskup Arason á Hólum flæmdi hirðstjóra Dana, Laurentíus Mule, burt úr eyinni og orti af því tilefni:

Víkur hann sér í Viðeyjarklaustur  
víða trúi ég hann svamli, sá gamli.  
Við Dani var hann djarfur og hraustur  
og dreifði þeim á flæðarflaustur  
með brauki og bramli.

Upp úr siðaskiptum lagðist af klausturhald í Viðey. Fer eftir það fáum sögum af staðnum í tvær aldir þangað til Skúli landfógeti settist þar og gerði garðinn frægan á ný. Skúli valdi „Innréttingunum“ samastað í „Hólminum“ þar sem nú heitir Reykjavík. „Var þar eigi önnur bygging fyrir en bæjarhús nokkur og hrörlegir moldarkofar,“ segir Jón Aðils í sögu Skúla fógeta.

„Stofnanir Skúla fógeta voru fyrsti vísir Reykjavíkurbæjar. Mætti því vel telja hann annan höfund Reykjavíkur, sé Ingólfur talinn fyrstur,“ segir Aðils. Segja má að Viðey sé föðurleifð Reykjavíkurborgar.

Fyrir skömmu eignaðist Reykjavíkurborg bróðurpart eyjarinnar. Í borgarstjórn eru uppi hugmyndir um að gera eyna að fólkvangi og útivistarsvæði borgarbúa. Er það vel til fundið. Viðeyingafélagið og Snarfari, félag skemmtibátæigenda, njóta nú þegar nokkurrar aðstöðu í eyinni.

Sjálf Viðeyjarstofa og nokkur landspilda umhverfis hana er hins vegar ríkiseign. Viðeyjarstofa er í umsjá þjóðminjavarðar og miðar hægt endurreisn stofunnar. Fyrir flutningsmönnum þessarar tillögu vakir að hraða þessu endurreisnarstarfi, enda verði veittir til þess nauðsynlegir fjármunir á fjárlögum 1985 og 1986.

Þann 18. ágúst 1986 verða liðnar tvær aldir frá því að Reykjavíkurborg fékk kaupstaðarréttindi. Af því tilefni væri við hæfi, þótt seinna komi til ákvörðunar, að íslenska ríkið færi höfuðborg sinni að gjöf eignarhluta sinn í Viðey og endurreista Viðeyjarstofu til minningar um Skúla fógeta, föður Reykjavíkur.

### Fylgiskjal I.

**Um Viðeyjarkirkju.**  
eftir Eggert Ólafsson

Þú er orðin fjalafá  
fúinn sérhver raftur.  
Hvað mun dagurinn heita sá  
er hefst þín bygging aftur?

(Eggert Ólafsson, Kvæði, bls. 196)

### Fylgiskjal II.

**Vísur um húsið í Viðey.**  
eftir Þorberg Jónsson Isenfeld (Lbs. 162, 8<sup>o</sup> bls. 57)

Hjer er verið hús að byggja,  
Af höldum kuldann tekur senn,  
Að því gera allir hyggja  
Aðkomandi og heimamenn,  
Með steinum múrs er stofnað nett,  
Strax á eftir kalki slett.  
Musteri slíkt af manna höndum  
Mun ei sjást á Norðurlöndum.

Álnir mælast alt í kringum  
Eitt smátthundrað sex og tvær,  
Ramlega bygt af rekkum slingum  
Reiknast furðuverki nær.  
Stafir sjö skulu standa þar  
Og sterkmúraðir skorsteinar.  
Hæð á múrum höldar inna  
Heilar sjö en ekki minna.

Kakalóna kappar brúka  
Kátir öllum stofum í,  
Upp úr þeim skal ætíð rjúka,  
Svo enginn fái grand af því.  
Hitinn gleður hölda líf,  
Hressir þjáða menn og víf.  
Bæði má þar brugga og sjóða  
Brennivín og rjetti góða.